

Ne znam za vas - ali mene je ovaj Davos načisto prestravio. Gledala sam i gledala (NCBC - interesantno da ga nema na programu naših kablovskih televizija, a i šta će nam biznis kanali, naravno...) sve te - trebalo bi - mudre glave, uporno se nadajući da ću vidjeti ama bar jednog koji ima kakvu takvu normalnu ideju o izlasku iz ove spirale koja neumitno vuče svjetsku ekonomiju naniže - ali uzalud... Svi, doduše, sjajno opisuju postojeće stanje, neki čak i znaju (otprilike) kako smo došli tu gdje jesmo, ali baš NIKO nema pojma kako iz ovoga izaći... Uglavnom, svi su nadošli da je u ovom trenutku najvažnije da svako svoju Državu što prije napravi budalom - i to zadnjom. Kako, a i zašto? Pa evo: Kad bi vam neko rekao da uzmete (recimo) svojih 8.000 KM, a da će vam Banka dati ostalih 92.000 KM da namirite potrebnih 100.000 za pokretanje vrlo profitabilnog biznisa, većina bi rekla da toga SIGURNO nema. A ja kažem da ima - iako, ruku na srce, ne u svakoj vrsti biznisa. Naime, ova finansijska akrobacija je neizvodiva osim ako ne pokrećete - Banku. No, samo u OVOM biznisu ovo je moguće - uzmete svojih osam posto, a ostalih 92 posto vam namire depozitari (tzv. Prve budale). E, onda krene fin i

lagodan rad i vi u svakoj transakciji rizikujete osam procenata svojih i 92 procenata TUĐIH para, što nužno dovodi do toga (jer ste stimulirani da što više zaradite - vaši lični bonusi zavise od toga) da preuzimate sve veće i veće rizike, dok vas vlastita pohlepa ne dotjera u domenu nerazumnosti (sjećate se onih NINJA kredita od prošli put, zar ne?). Jer - ako nešto i pođe naopako, doći će novi (također pohlepni) depozitari (tzv. Druge budale) da svojim depozitima isplate ili bar drže one Prve u uvjerenju da je sa njihovim novcem sve u redu. I tako u krug, i tako sve brže i brže, a sve funkcioniра tako da se uvijek pojavi Slijedeća budala... E, problem je u stvari nastao kad se ona nije pojavila. A Davos je (blago li je nama) genijalno ponudio rješenje (bar kratkoročno) kao zeca iz šešira - svi su se složili da će opet sve biti divno i krasno samo treba naći Zadnju budalu koja će, da se žargonski izrazim, "iskeširati" sve one predhodne.

Ta Zadnja budala osim što treba da bude sporomisleća (da ne kažem glupa) mora biti i bogata.

Jel' to neko spomenuo Državu? **B**

Aida Delić

Glavna i odgovorna urednica